



名家表選卷之六

通州自便謝表

陳瑩中

恩由獨斷澤被孤忠刑部之執守雖堅天子之福威無壅  
乃公朝之盛事豈小已之私榮恭叙威宗仰贖高聽中謝  
伏念臣昨蒙善貸賜以生還萍跡孤暎久寄食於異縣草  
門幹蠱常委事於長男所營不足以藩身其出每緣於餽  
口去庭闈者累月聞道路之一言耳受而輒行親危而不  
顧緣帥司深疾其生事故傳者多指爲病狂萬口嗷嗷兩  
路詢詢狐突教子素存不二之風曾參殺人寧免至三之  
惑事旣匿而難曉時浸久而益疑制勅深嚴就逮於重江  
之外獄辭平允閱實於片言之申矜其無罪之可書許以

還家而自便出園扉而涕感瞻魏闕而留神尋沐寬恩移  
置近地海島萬里不如無子之無憂淮壩一身彌覺有生  
之有患擢髮不足以數臣之罪瀝血不足以寫臣之心羔  
羊之性至公大馬之情愛主忘身狗國初無係悞之私抱  
疾呼天惟恃精誠之格忽因詔諭特免拘維此蓋伏遇  
皇帝陛下堯大并容舜明同照人人皆使之得所事事唯  
恐其有偏繼志周神考之心應天以格王之實舊弊若冰  
之將釋新慶如川之方流家國平康內外交泰遂使赦令  
昔阻隔而今行士有宿愆始棄置而終宥全家荷德無路  
酬恩蠅蟻之力至微但知恭順蒲柳之身已老尚可糜捐  
望雖隔於戴盆志敢忘於葵藿

台州羈官謝表

陳瑩中

猷畝之志一書可通芻蕘之言萬里不隔集群辭而上達  
遭一覽以爲榮竄路雖遙陳情已畢中謝伏念臣材如糞  
土身若稗蓬非敢以著書爲能所陳者戴君之義如詆誣  
之不可志在尊堯宣行用之敢私心唯助舜語言無緒議  
論甚迂獨歸美於先猷遂大違於國是不行毀棄有誤咨  
詢虛消十載之光陰靡恤一門之溝壑果煩揆路特建刑  
章若非特庇於九重安得延齡於再造由淮入浙自通至  
台怒濤難阻於重江毒瘴幸殊於五嶺尚留頂踵獨賴君  
親此蓋伏遇 皇帝陛下天大并容日明洞照以至慈而  
善昏准觀過之深仁憫此顛隳欲其存在以身償怨蠅蟻

之命至微狗國捐生犬馬之心未替憂馳丹闕目想清光  
重千擢髮之誅徒鬱戴盆之望餘生易捨大德難酬

代賀明堂禮畢表

陳瑩中

有司備物親嚴三歲之祠率土均恩實賴一人之慶照臨  
所逮歡抃攸同中賀伏惟 皇帝陛下道貫神明功參覆  
載昭哉嗣服續六聖之洪休大矣孝熙備三公之至養擢  
英髦而共政革苛弊以濟時庶事用康善祥斯應物無疵  
孺民不怨咨尺地得以清寧草木遂其零茂九功之德既  
皆可歌四海之臣亦各來祭乃遵彝典爰盡孝思時以季  
秋之良日用上辛之吉始告虔於原廟遂嚴配於合宮精  
意感通景貺昭答大賚而兆人富肆青而衆心新實萬世

無疆之休蓋千載不逢之命臣乍辭帷幄方守藩垣徒欣  
右饗之成莫預駿奔之列瞻望闕庭

代程給事乞致仕表

陳瑩中

臣聞耄老遽歸非臣子報君之義既衰猶仕豈儒生處已  
之方惟去就適合其時乃進退不愆於禮輒陳悃逼仰黯  
高明臣誠惶誠恐稽首頓首伏念臣家本單微材充綿薄  
早緣章句敲律之末技偶中 上科繼以簿書訟獄之微勞  
誤更劇任三持使節八領郡 麾以至承乏小行人之官位  
備大司農之屬山川跋涉幾 徧於五方日月推移殆踰於  
四紀遂叨蘭省之秩仍忝秘 殿之名每撫心而自循縱沒  
齒而馬報昨以蒙恩罷守被 去歸班身雖寄於海隅夢已

升於帝所非不知懷金結綬待清光而足榮佩玉鳴騶  
法從之爲幸但以風霜漸迫蒲柳遽衰爰及上印之期當  
批乞骸之懇日暮途遠顧已分之非安漏盡鐘鳴亦人言  
之可畏伏惟 皇帝陛下恢覆載之量廓照臨之明憐其  
實知止而請身察其非偷安而避事俾還官政獲反里閭  
況臣北陌東阡雅多遊舊左食石粥良給歲時是以誦歌  
真主之稀逢盛述聖朝之難遇四方羸老徒結戀於軒墀  
木已朽枯或能蒸於芝菌

代高麗王謝賜燕樂表

孫仲益

十行賜札誕彌遼海之邦萬里言文普聽鈞天之樂俯慚  
虛受中積愧懷伏念臣錫壤三鼓襲封四郡環居島服習

聞夷鞞之聲仰睇雲門實眩咸池之奏方重華之上治躋  
累洽之閔休監二代之敷文命一夔而制樂登歌下管天  
地同流鼓瑟吹笙君臣相說加首鹿革之饗輔成魚藻之  
歡有懷疏逖之臣亦與分放之數玉帛萬國千舞已格於  
七旬蕭韶九成肉味遂忘於三月仰止祝將之賜鬱然食  
侑之光驟此叨居殆無前比茲蓋伏遇 皇帝陛下躬待  
慈寶不冒仁恩通道八蠻坐致遠人之悅同符五帝肇聞  
古樂之興出大晟之珍藏作朝鮮之榮觀兜離一變慈惠  
均敷蕩蕩乎無能名雖莫見宮墻之美欣欣然有喜色咸  
與聞管籥之音稽首拜嘉周邦來賀臣敢不服膺睿獎謹  
度遐方仰九門之句傳徒起哉益之望與百獸而率舞但

深傾藿之心

皇子謝賜御書孝經一六句表

孫仲益

睿謀垂裕夙承父訓之嚴神靈疏恩備舉聖經之要因心  
立教拭目知榮中謝惟夫子一發微言為曾參而陳孝道  
首述君親之事謹始及終復崇富貴之移戒危與溢身行  
口言之無失天經地義之兼該事可法德可尊表裏俱正  
居致敬養致樂造次弗違神明四海以交孚進退一忱而  
匪懈有倬飛鸞之翰於昭貽無之謀二八句之特書撮其  
樞要千萬人之咸悅始於家邦仰攸爾英之屏俯殊制旨  
之注矧熙朝資善之學肇祥符丙辰之春詔儒臣而讀是  
經錫宸章而刊諸石游觀泚灑宏賁前猷臣德匪溫文性

慙岐嶷出有師入有保垂虞庠親則父尊則君恪趨周  
寢曩者分封之渙號誨之生孝以移忠旨趣會於五經未  
窺聖蘊德教加於百姓徒無皇仁載覩河洛圖書之光  
如親洙泗問答之語茲蓋八遇皇帝陛下學稽古典筆  
寓天常作嗣萬年受祉而又於子冠冕百行得手而應於  
心祖武可稱人文增煥臣敢不聿嚴琰寫式廣家藏朝夕  
歌六章之詩遠邁唐宮之賜札夙夜事一人之訓恭脩建  
邸之陳圖

謝講和赦表

岳鵬舉

觀時制變仰聖哲之宏規善勝不爭實帝王之妙筭念此  
艱難之久姑從和好之宜睿澤誕敷輿情胥悅中謝臣竊

以婁欽獻言於漢帝魏絳發策於晉公皆盟黑未乾顧口  
血猶在俄驅南牧之馬旋興北伐之師蓋夷虜不情犬羊  
無信莫守金石之約難充溪壑之求圖暫安而解倒垂猶  
之可也顧長慮而尊中國豈其然乎恭惟 皇帝陛下大  
德有容神武不殺體乾之健行巽之權務和衆以安民乃  
講信而脩睦已漸還於境土想喜見於威儀臣幸遇明時  
獲觀盛事身居將闔功無補於滄浪口誦詔言面有慙於  
軍旅尚作聰明而過慮徒懷猶豫而致疑謂無事而請和  
者謀恐卑辭而益幣者進臣願定謀於全勝期收地於兩  
河唾手燕雲終欲復讐鼎報國誓心天地當令稽顙以稱  
藩

謝上表

洪景廬

禁門直北久違龍尾之趨藩郡落南忽玷虎頭之寄卽祇  
官次恭布詔條中謝伏念臣濩落而無所容愚僮而不逮  
事遭逢嘉會自孤天地之恩留滯窮塗已隔江湖之夢不  
謂左符之寵恒勤前席之思今所領州故爲劇鎮地方千  
里接甌閩百越之區縣列十城介谿谷萬山之阻人虛驕  
而尚氣俗崇嚴以難馴平時蒙珥筆之敷曩歲蹈弄兵之  
釁皇風下暢旣洗滌於三薰習氣相挺始漸摩而一變得  
居長吏真可備負茲蓋伏遇 皇帝陛下德如仁宗武類  
藝祖及國家之閑暇先務養民知稼穡之艱難益嚴宅牧  
過令臣輩亦預遣中重念臣頃侍清光最紆殊眷雖兩言

溢惡欲興投抒之疑而一意在公獨賴垂旒之監致茲投  
拭盡出生成北膺便坐之從容曲軫溫顏而慰藉感聖度  
不忘於微賤顧孤蹤寧慮於棄捐臣敢不鞭策疲駑奉行  
寬大卽墨受封於萬室豈曰能賢會稽上最於三年其惟  
共理

饒州謝上表

洪景盧

禁林挾日未遑坐席之溫鄉郡一麾偶遂分符之便雖始  
願不敢及此非罪人乃能得之爰奉庭闈卽趨官守中謝  
伏念臣生而性介夫與數竒應真主之誤知建軍車而出  
使茹毛北海已驚半世之遷除館西河幾絕一生之望敢  
期天幸獲以身遠方深故土之懷猥辱高門之召果聞取

及於致疾頰上印綬以歸田固爲輕典佩銀黃而夸里更  
沐殊恩捧檄入門過家上冢桑梓遂晨昏之養松楸寬夢  
寐之思行道觀瞻合宗感涕茲蓋伏遇 皇帝陛下合德  
天地玩心神明常思四表之歡不錄萬里之過而臣空行  
空反曾茂效於秋毫乍佞乍賢尚叨榮於畫錦內而自訟  
其又奚言敢不上體至仁仰圖共理奉三年之計自惟無  
補於朝廷推一日之長庶或兼容於獄市

建康謝上表

洪景盧

香火奉祠久卧漳濱之病絲綸借寵忽開江表之藩方俯  
僂以固辭辱丁寧而趨上荷恩滋甚揣分難勝中謝伏念  
臣孤起諸生親逢上聖頓年近侍空餐積懼於人言累月



中樞伴食敢安於天職退從散位伏俟嚴誅當王度之清  
夷列公材於中外臣之無似上所誤知奉留都管鑰之嚴  
況顛帥捆受連府節符之寄仍護鄉州三組以夸一朝而  
獲茲蓋伏遇 皇帝陛下如天至健若日大明處法官之  
中五帝其名莫及行聖人之政三王之盛易為赫然夫決  
於小人卓爾晉昭於君子一新美化可謂昌辰豈伊朽鈍  
之餘首玷蕃宣之重臣未知為吏何以治民安田里而無  
嘆愁雖謹思於體國以簿書而報期會諒不免於察官唯  
有愚忠仰酬大造

代福淮東舉茶事謝上表 後兼常平 洪景盧

摠浪舶於三吳訖微善狀按雲艘於百越復冒除書揆日

問塗欽辰指部中謝切以漢規先具開邊糴以均輸唐務  
富儀藉關征而贍本雖有便民之志頗乖實廩之宜紛更  
旋奪於廷臣捐瘠或隨於軍用迨中世徒場而推茗致諸  
蕃塌地以名錢大抵虛文茂聞見效偉聖明之立制張職  
守以建官吏偶失於三思事寔成於一切維時改作盡復  
舊章自非通敏之流曷副班宣之責如臣者猥蒙世賞辱  
在周行無材能閎閎之勞固宜反退習功利分銖之事豈  
有寸長曾使華荐霑恩紀茲蓋伏遇 皇帝陛下體天  
剛健措國清寧總六服以收賢明德遠矣訪萬幾而詢政  
使人器之遂今朝著之微亦玷軒軒之寄臣敢不裒多益  
寡散滯取贏一身而二任之加勉祗承於上意三登遺九

年之食庶還定於王氏

國史院進三朝正史帝紀表

洪景廬

三后在天誕著丕謨之懿百年積德惟憑信史之傳方論  
次之開先仰威靈之如在載洎昧旦輒冒宸嚴臣等惶懼  
惶懼頓首頓首竊以詒厥孫謀實為大訓必有不刊之典  
用扶可久之基赫赫裕陵制作擅百王之冠魏魏哲廟規  
恢宏七世之觀迨昭考之勃興備盛朝之盡美治安之極  
剖判所無禹繼舜舜繼堯顧三聖而守一道事繫時時繫  
月宜一經以垂亡窮慨多歷於歲華訖未施於功緒蓋士  
起異同之論而時更板蕩之餘視熙豐符祐之成舉是非  
而雜揉攷崇觀政宣之志頗放失於舊聞賴故家遺俗之

猶存致偉蹟閔休之可紀參稽定貫允屬昌辰恭惟 皇  
帝陛下宗祏宅心蒸人墻係念明列祖之成德以庶邦惟正  
之供覲文王之耿光善孝子述人之事欲壯西廂之御趣  
褒東觀之書臣等自媿庸虛敢知筆削書大事而小則簡  
牘已殫細素之勤藏名山而副在京師終冀汗青之望

謝除翰林學士表

洪景廬

禁直重趨功未施於起草除書亟下命忽忝於拜真人以  
為榮自知不稱 中謝 伏念臣詞章甚陋問學尤疎習氣拘  
牽生死不離於文字宦游僥倖去來何計於鴈鳥正憐羣  
落之蹤趣點便藩之召大恩無量舊觀頓還載惟玉笋之  
瞻儀莫越金坡之要近在於聖世尤重正自魏三紀之提

期董七人之占位君臣千載信嘉會以難逢兄弟一時乃  
英躔之濫繼施生若此報答謂何此蓋伏遇 皇帝陛下  
稽古重華參天施化坐明堂而朝群后方不顯於斯文起  
晉陽而爲一門殊曲成於私覆肆容弱直捷上華塗臣敢  
不益所不能鞭其最後視淮南之報賜詎測津涯去塞北  
之煙塵誓殫潤色

謝除禮部尚書表

王謙中

外閫暫分遽逆歸於驛召昕朝甫對卽擢長於春官廣寵  
逾涯撫躬增懼中謝伏念臣奮身孤遠逢世休明仕不因  
人終始皆蒙於睿簡才非適用險夷但竭於愚忠去國倚  
廬起家臨鎮豹尾隔四年之從麟符專一道之權聞田里

之歎愁具知疾苦頒條召之寬大方究撫綏敢圖宣室之  
具恩誤玷中堂之率屬跡陪鴛鴦恍疑夢寐之回獲上星  
辰頓覺依乘之近被服章之安吉引車轡之閑馳榮渥併  
加微軀難稱茲蓋伏遇 皇帝陛下曁聰建極知哲能官  
聚英雋以尊朝蓋爲本根之慮咨且清而典禮不徒玉帛  
之云退省迂儒曷膺妙選臣敢不益堅素節仰報隆知顧  
北斗喉舌之司當謹出納如稽古禮文之事敢廢討論

謝除吏部尚書表

顏幾聖

吏曹兼組僅輸累月之勞帝展疏恩遽陟三銓之首居然  
就職惕爾懷慚中謝伏念臣初無適時可用之才徒有泥  
古不通之學擢從臣之橐俯仰四方使老上之庭往來萬

里歎賢勞之何有荷聖眷之過優既叨小宰之除復攝冢  
卿之乏而臣技窮能薄景迫年侵游騰告老之章未動蓋  
高之聽敢圖簡記反使甄陞維天官分典於銓衡而帝伯  
實提其綱領頂嘗兼掌猶懼弗勝茲命顯官益虞非据併  
錫身章之寵仍頒廐乘之珍顧異數之駢蕃將何功而稱  
塞茲蓋伏遇 皇帝陛下規模天大睿知日躋照臨溥暨  
於群工禮遇尤先於近列知臣朴忠有守寒松不改於凋  
年憐臣氣力未衰老馬或諧於故道乃頒茂渥猥及微踪  
臣謹當仰體隆私益堅晚節壯心雖在詎敢受誚於糜捐  
來日無多終須祈求於閑退

謝除太子詹事賜衣帶表

王龜齡

歸依故里首叨宮丑之除趨對使朝猥被身章之錫省脩  
何幸俯僂難勝中謝伏念臣有不移之忠無適用之器襲  
布韋而自薦繡一悅以奚爲分三服之珍方曳裾而自愧  
拜九還之重覺委佩之有光夫何衰病之樞仰冒便蕃之  
寵茲蓋伏遇 皇帝陛下教子以義方之訓好賢如緇衣  
之詩借以光華欲其贊翼惟少成若性但知歛衽之恭而  
非禮勿言敢後書紳之戒誓殫綿力少答殊私

謝除敷文閣侍制表

王龜齡

官自外遷既濫中權之寄恩由上出復叨次對之除抗章  
弗俞拜命增惕中謝竊念臣才惟樗櫟業本蘊鹽偶逢神  
聖之作興妄意風雲之際會立竊替筆方近清光冠豸乘

驄遽違丹闕俯悵中懷之莫盡仰知天眷之未衰繇列郡而擢居帥垣自集英而超躋華閣易任誤蒙於增秩撫躬深愧於罔功清議靡容牢辭不獲茲蓋伏遇 皇帝陛下至仁接下大度包荒謂臣如汲長孺之愚言多妄發知臣有蘇世長之短心不敢邪榮畀重藩許連從橐臣敢不益堅素守誓竭孤忠共理分符何以副西清之選拾遺補過可能無北闕之書

謝除敷文閣直學士表

王龜齡

任南國守臣之寄治劾茂聞綴西清學士之班聖恩誤及牢辭弗獲下拜有慙中謝竊念臣學術空疎性資愚魯躬耕養安懷干祿之心晚竊科名誓竭事君之節許身自

比於稷契得時況過於唐虞上皇親擢之於布韋陛下又置之於臺省徒屢膺於任使竟莫報於涓埃去國八年分符四郡覺年齡之云暮致疾病之交攻藥百試而莫痊詞三乞而不允心勞政拙竟同下考之陽城金賜秩增有愧能名之黃霸揣分宜黜蒙恩若驚茲蓋伏遇 皇帝陛下仁覆邇遐賞從忠厚與人不求其備嘉善而矜不能謂臣雖不達於時宜知臣或稍諳於民事罷畀侯藩之重超陞庭閣之榮臣敢不仰務分憂俯當盡瘁拾遺補過雖良臣之願莫酬宣化承流庶循吏之風可繼

守臣謝賜御書周易尚書表

湯進之

宸章帝藻燦如琬琰之傳神畫聖謨較若天人之備啓函

拜賜拭目知榮竊以法始四管莫辯乎易文兼五典皆聚  
此書續東魯之章編發先秦之竹簡意廣大而莫測辭灑  
聖以難窺其在累朝以爲古訓顧宣帝立梁丘之學豈革  
茲茲之談彼明皇覩洪範之篇徒改陂頗之字未有留神  
一夜探賸前經刪妄論於九師撥微言於四代寫之縑帙  
示於縉紳體飛動於龍鸞義昭回於星斗月將日就 聖  
學於祗勤墨妙筆精竦侯藩之瞻戴懋乃非常之績屬我  
中興之朝恭惟 皇帝陛下識際道真行高世表垂衣裳  
而致治善取乾坤廣視聽以御圖一似堯禹故此躬行之  
至見乎心畫之間教兼被於臣鄰賜不殊於中外秘書深  
刻已參淳化之孝經萬國咸頒遠陋漢光之手札臣叨分  
符竹獲覩寶奎八法難知徒驚端勁適偉之狀一圻所治  
願布精微疏通之風

謝改州表

湯進之

帝天廣覆舊邦驗民數之登侯社旁開新命首官僚之建  
山川頓爲之改觀人事歡謂其更生 中謝竊以喻在偏方  
世稱樂土孫吳之時始創爲新喻縣李廣之初嘗析置南  
吳州蓋歷朝之沿革不常而百里之廣輪如昨其民畏刑  
而訟簡其士樂道而俗淳中更蕩析以離居未幾還定而  
安宅側聽南公之相語深惟先帝之至仁版圖既入於職  
方戶口倍增於井牧若稽古典宜列中州茲蓋伏遇 皇  
帝陛下乾坤包涵父母愛育家四海而無外利萬物而不

遺謂四萬五千戶之區。惟天與祖之付我。而三百六十官之屬。曰吏以治。而得民。遂令外服之賤。微獲備中朝之選。其等遭逢聖代。鼓舞皇恩。既登進於吏民。爰奉宣於德化。服休服采。願聞乃屬。而一心於蕃。於宣敢祝吾君之萬壽。臣無任。

代宰臣以下賀日下有五色雲表

秦會之

聖主當陽庶矣。際千齡之運。卿雲抱日。清臺占五色之祥。景耀觀瞻。歡均率溥。中賀。竊以仰模乾象。懋建國經。君德無私。明有同於日。照臣職匪懈。勢有類於雲。從惟心合。而益章則效隆。而靡忒。乃如今日。允謂昌期。如蓋如盤。方顯照臨之用。非煙非霧。六呈承戴之華。諒非此道之默通。孰

致彼蒼之昭假。稽諸往牒。實未前聞。曆候躔離。但書於合璧。慶符養育。徒擬於園車。當知上瑞之難全。必待盛時而畢。見是為常道。匪曰私親。伏惟皇帝陛下。揆道統天膺時御。極體離明。而燭物需需。澤以懷人。輝光發衷。德又新而無蔽。臣等假寵惟舊。常依日月之光。委質何功。偶遇風雲之會。誓勤綿薄。永介昭明。帝袞長瞻。固已傾心於就望。官名久正。毋庸紀號於青黃。

謝除翰林學士表

汪彥章

非才冒寵。久誇文石之班。優詔傳恩。趣上玉堂之直。既假朝章之煥。仍分御府之珍。遜避莫從。叨塵為懼。中謝伏以文章雖本一技。命令實行四方。故自古禁林之除。極當時

儒者之選。矧今多士。尤重他官。內敷帝制之坦。明外應軍  
書之驚。急學非閑。博難酬。跋燭之咨。思或淹遲。將誤掣鈴  
之召。當時環傑來承。燕閒如臣者。得以諸生起於遐裔。首  
尾策名之二紀中間。不調者十年。會真人光復之初。陪列  
辟駿奔之後。驟膺東掖。徧歷高華。既時巡清蹕之屢移。方  
驛召群英之未至。執羈在道。視草無人。姑從東省之聯。兼  
候北門之對。嘗因多病。不勝徇馬之心。願賜寬恩。任逐桑  
榆之暖。卒云代價。遂使爲真。茲蓋伏遇 皇帝陛下。志靖  
華夷。憂深宵旰。勵精於學。每求稽古之臣。罪已以言。欲致  
銷兵之福。治雖得要。人豈當材。臣敢不仰佩眷知。力思補  
報。絲綸行遠。顧奚俟於丹青。海嶽居微。或有資於塵露。

賀赤烏白鵲表

汪彥章

治格時雍。祥昭羽屬。生皆異稟。凝丹素以成形。出若相符。  
信圖書之上。瑞必有召。此來非偶然。中賓伏以烏本陽精。  
鵲知歲事。方聖祚紹隆。於火德適天時。應在於金穰宜爾。  
珍禽呈茲瑞質。孝能致哺。煌煌儀則之新喜。必傳音鸞鷟。  
羽毛之縈用明。諸福之畢至。孰謂二蟲之無知。恭惟 皇  
帝陛下。保合太和。緝熙純嘏。跂行喙息。皆安性命之情。岳  
貢川珍。盡發乾坤之蘊。是生神物。來相昌期。將合采以成  
章。乃同時而薦祉。徊翔有煒。協周家王屋之符。粹美而真。  
異莊子彫陵之見。既九重之有托。寧三匝以求安。臣等幸  
列近司。喜逢休應。有生咸遂。宜多可俯之巢。同類相求。將



致來儀之鳳

群臣上皇帝勸發第一表

汪彥章

天命有歸將嗣興於景運人心胥悅咸睽就於至仁雖粹表之非遙猶鴻稱之未正辱居近列殊震危衷中謝伏念臣叨受國恩早居法從方百六朝廷之厄會偶二三輔弼之無人猥以庸虛參其謀議旋屬虜情之變遽成天步之艱二帝出郊既蒙塵而不返九祧乏祀將攝裸以爲名所宜引死以力爭顧獨包羞而苟活生雖可耻志則甚明蓋天下屯危方苦存亡之未定而古人事業唯觀濟否之何如使生靈相顧以無歸雖溝瀆自經而奚益輒慕周勃安劉之計庶伸程嬰存趙之忠儻奉真人光膺神器嗣一相

八君之序慰四方萬里之謳吟誓伏歐刀敢煩司敗幸率土相從而歸啓且諸侯不輟以事周雖國鴻休實臣素志願假須臾之死前瞻咫尺之威伏惟 皇帝陛下中奮英明外符信順受圖高邑之璣趣駕未央之宮盛九賓之禮以見群臣輯六獻之儀而朝清廟時方多故幸少留黃屋之心臣既無功願自謹青宮之職

謝除兼侍講表

汪彥章

視草禁嚴談經閒燕叨近侍進言之責極儒臣稽古之榮拜命以還撫躬而懼中謝常謂天縱將聖奚須博學以成名王求多聞蓋欲取人而爲善故自古右文之世必留心講藝之官如臣至愚何以仰稱茲蓋伏遇 皇帝陛下卓

然上智濟以克勤同漢祖之英論道不忘於息馬笑齊侯  
之陋讀書見議於斷輪而臣猥以非才膺茲遴選第竭簡  
編之習仰承帷幄之光雖海岳深崇顧何取消埃之細然  
聖賢聞見或不如農馬之專

謝進書特授左中大夫表

汪彥章

國史補亡雖日勤於采獲君恩馭幸乃歲冒於遷除矧方  
抱於遺弓忍獨榮於載筆上還不獲退省為憂中謝恭以  
太上皇帝聖學高明天資仁厚承熙洽百年之後享安榮  
兩紀之餘凡今言動之所傳視古詩書而無愧祗緣誤國  
之相繼循致陟方而不還既海隅皆服於堯喪宜柱下一  
新於漢法夙蒙垂付適幸纂成豈謂 皇帝陛下明發有

懷兼收罔棄嗟夏時之既失於杞吳稽幸商頌之復全以  
那為首特懋存書之賞猥霑承學之臣敢不仰奉殊私俯  
殫絲力哀中朝副墨之要俟良史如青之求穆王御駿以  
來歸已孤此望孔子感麟而有作尚見其人

謝除兵部侍郎表

汪彥章

東省疎官方析病免中臺分職乃誤優遷資逢世以非宜  
寵逾涯而益懼中謝伏念臣江湖遐裔章句小儒材不過  
庸僅及下中之品學雖忘老安知左右之原偶陪多士之  
遊幸備公朝之選徧誇清貫遂綴邇聯旋遭值於干戈獲  
奉承於羈勒才因事見初無橫草之功裁與衰期乃有負  
薪之疾屢投誠於魏闕將歸卧於漳濱猥蒙內史之書俾

貳文昌之秩成昭所繫儒綬奚堪茲蓋伏遇 皇帝陛下  
睿智有臨憂勤無逸光復祖宗之舊既以配天兼收文武  
之長未嘗愒日惟臣瑣屑負國明恩竭股肱之力而徒有  
此心譬腹背之毛而何裸於用耗糜廩食羞愧神明不辭  
免効於秋毫顧恐溢先於朝露周六典治官之職雖幸叨  
居漢九卿賜誥之恩終期得請

謝授新安郡侯表

汪彥章

禮洽中天慶覃外服猥奉十行之詔就加五等之封臣中  
謝伏念臣積冒恩私浸踰分願作偷閑於異縣蒙起廢於  
徧城久客還家方憇南飛之鵠通侯授印忽成左顧之龜  
雖滲漉以惟均何遭逢之獨異茲蓋伏遇 皇帝陛下調

貽萬類藩飭群工屬宣宗之受釐釐寰區而蒙福臣適臨  
本郡仍胙鄉州宋人泝泝以得封望胡及此漢將銀黃而  
夸里榮乃過之寵既逮於子孫忠敢移於生死

謝泉州到任表

汪彥章

恭承休命就易名藩去父母之邦接浙敢同於他國問蠻  
夷之俗褰帷如在於中州貴重捫心恩深隕涕中謝伏念  
臣昨從祠館叨領守符素號迂踈無問馬及羊之智乃蒙  
安便得維桑與梓之州二年而勞力勞心一身而畏首畏  
尾力祈罷免反冒遷除雖賣劍買牛老猶堪於渤海然舉  
頭見日身益遠於長安茲蓋伏遇 皇帝陛下總覈百工  
照臨萬國眷方隅之瀕海須師帥之得人故遣近臣往綏

遐俗況今閩微莫盛泉山既旁接書文之同當尤懲獄市  
之擾臣敢不仰遵寬大俯厲衰殘講求百粵之宜參諸禹  
貢奉上三年之計對以春秋

謝謫永州居住表

汪彥章

羸愚冒寵久依日月之光盈滿挺裁自處雷霆之下蒙聖  
恩之寬大與善地以生全罪大心寒感深涕落中謝伏念  
臣初無稱道積有悔心所當退養於罷癯乃復浸成於老  
壽忽聞威命適在窮途冒風雪以疾馳越江湖而跼伏非  
恃是撓之察難逃鈇鉞之誅茲蓋伏遇 皇帝陛下剛健  
法天聰明稽古千文不用再臻全盛之時刑賞何心一付  
至公之論而臣靡思 兢慎仰負函容餅居井眉雖有措身

之地狐正丘首未知歸骨之期

賀皇太子正位表

汪彥章

伏審顯膺寶冊升位春宮臨軒行曠古之儀見廟示承祀  
之重恭惟 皇太子殿下分輝寶緒毓粹璿源挺天人岐  
嶷之資稟神聖徇齊之教當周室本文之盛獨冠百男宜  
漢家羽翼之成無煩西皓前星外炳游震中潛某幸列宗  
枝喜隆邦本河潤九里方率族以依仁月有重輪願登歌  
而薦祉

謝除樞密使表

汪彥章

本柄於中久污樞密之地進班其首更叨綸綍之恩蒙眷  
獎之非常私瑣材而不已安危所係榮懼交深臣惶恐惶

恐頓首頓首伏念臣生江湖之鄉非廊廟之器偶扞防於  
牧圉蒙記錄於冕旒當中興無文武之才有慙告庸乃一  
見受腹心之寄自比留侯荐膺推擇之榮遂處弼諧之任  
謀參帷幄職總鞞鈴永言國步之屯方賴廟謀之勝外有  
交侵之強虜內多竊發之姦民兩河未復於輿圖二聖尚  
勞於岳符非其莫濟得士斯豈伊章句之腐儒堪此朝  
廷之大任茲蓋伏遇 皇帝陛下治先稽古志在宅中躬  
堯舜之仁雖欲濟民於富壽摠高文之憤不忘克已於憂  
勤詳延左右之臣猥及下中之品臣敢不兼收群策務究  
遠猷念國家嘗膽之憂適當今日豈臣子拍驅之報或後  
百人

代辭節度使表

汪彥章

誤恩隆洽久蒙曠職之譏小已兢慚敢緩辭榮之請具輸  
愚懇仰冒隆威中謝伏念臣早濫褒揚侵階華近雖孤忠  
圖報誓糜殞以為期然晚節知非悟滿盈之可戒昨侍言  
於帷幄祈休迹於田廬甫解煩機遽頒異數以章句小儒  
而竊授方之寵以斗升素志而叨制祿之優方渙號之已  
行固牢辭而莫獲坐貪名器存歷歲時若猶冒昧以自如  
將至顛隳而靡悔伏望 皇帝陛下特垂公聽俯諒忱辭  
鑄築壇節制之名守留金匱允鑿之任豈獨少安於分願固  
將無累於恩私既聖度曲全諒保益謙之終吉況天威未  
遠敢忘歸美之餘忠

代汪樞密辭免表

汪彥章

入參廟筭方俟黜幽進長樞庭更叨圖舊仰荷褒揚之過  
實深盈滿之憂敢布腹心仰干旒辰中謝臣竊以聖主之  
用人也必量其材之所至忠臣之事主也先度其力之所  
堪故爲之上者靡傷知人之明爲之下者得逃曠職之累  
一失此道兩乖厥宜如臣者初乏經綸特緣遭遇二紀服  
周行之末一朝居多士之先昨叨近弼之除已過平生之  
望豈有方更於晦朔居然躡次於鈞衡雖至無知敢忘自  
揆伏望 皇帝陛下以降寬盡物以獨斷馭臣知愚誠蓋  
出於由衷於成命何嫌於反汗別求賢佐共圖宏濟之功  
無使孤蹤益重疾顛之禍

代汪副樞辭免表

汪彥章

聖神有作方收海內之人豪綿薄何功遽本朝廷之兵柄  
顧超踰之已甚雖庸情以知辭中謝竊惟樞院之司實次  
鈞衡之任唯時初載順信獲助於天人宜帝遠圖安危注  
意於將相儻以小人而大受孰宣元老之壯猷如某者生  
本寒鄉出陪多士早從外補甘心簿領之勞浸齒周行敢  
意功名之會昨屬裔夷之謀夏猥承明詔以臨州內撫三  
軍本無竒策外乘一障僅守故封會帥幕之肇開總兵符  
而入侍杆防牧圉跋履山川逮九五御圖之初預三千同  
德之列負羈縶而巡天下自知罪戾之多聽鼓鼙而思將  
臣敢幸搜揚之及既委腹心之寄仍加體貌之優非不願

榮懼終速謗伏望 皇帝陛下特垂淵聽俯諒危衷收渙  
汗之誤恩責捐軀之後效義非所處雖匹夫不可以利回  
情有可矜在明主固容於理奪

代薛左丞謝除門下侍郎表

汪彥章

久參帷幄方俟黜幽進貳機衡遽叨圖舊莫寢已成之命  
唯深非據之憂席寵過隆撫躬何幸 中謝 伏念臣粵從孤  
遠遭值聖明少誦師言每信書而違俗晚陪國論更充位  
以妨賢家滯鑒之誤知保孤衷而平進肆竭股肱之力何  
施毫髮之功豈伊白首之衰蹤堪此黃扉之重任雖緣人  
乏實玷詔除茲蓋伏遇 皇帝陛下剛健粹精聰明齊聖  
疏通萬物之理灼見群臣之心猥憐撲學之無他擢處周

行之至要第崇資顯秩當有用之材方治世昌辰尤急可  
觀之效誓勤鞭策力振綱維與多士以同寅上承休德殞  
百官而圖報敢愛餘生

謝除權吏部尚書表

樓大防

充負瓊闥自顧罔功撮長銓曹忽蒙誤寵仰皇慈之至渥  
揣微分以何堪中謝竊以選部持衡夙號六卿之長文昌  
聽履實爲八座之聯非素推公方不足以扼吏奸非妙有  
德望不足以厭輿論雖黃織之下無參異同而縉紳之流  
鮮不關係宜求精敏之彥以當要劇之司伏念臣才不逮  
人學徒泥古一爲支郡三入脩門久侍上皇愧愚衷之無  
補親逢嗣聖荷褒擢之有加代言非陸贄之工批勅謝李

藩之器俯徇芻蕘之論屢寬斧鉞之誅去省眼者五年遂  
躡登於冢宰離班心者一載遽首列於從臣禁林兼內制  
之文史館涉信書之筆滿盈已甚控避莫回頒御府之襲  
衣益之鞶帶駕天閑之良馬覆以雕鞍但喜悅親之私敢  
云稽古之效茲蓋伏遇 皇帝陛下多能天縱聖德日新  
蒐舉異才踵登持索之選優容棄物獨負改竿之勲宜黜  
而遷以榮為懼臣敢不深思僥冒勉竭疲庸為山公啓事  
之書知非所及守崔亮停年之格何足言勞尚幾典選之  
平少助官人之道

謝代吏部侍郎表

樓大防

代言西掖少拜誤恩攝貳東銓復叨改命循墻莫避臨谷

增危中謝伏念臣濩落無堪汗愚自信正以經營於菽水

故嘗希望於斗升昨自外官恭趨嚴召猥廁內朝之鶴列  
親覩上聖之龍飛五歷粉闈一參月寺籌邊戎幕無婉畫  
之可稱將命虜庭幸歡盟之復締冒柱史詞臣之選兼官  
端寶牒之司初無左右之先容盡出聖神之親擢忽承帝  
制俾倅天官一新龜紫之榮仍假銓衡之長莫回成渙徒  
激懦衷茲蓋伏遇 皇帝陛下虛以受人明於分職憐臣  
孤立於官路借以末光謂臣曾歷劇於曹付之重委臣敢  
不寅遵邦憲嚴制吏姦朝夕論思雖素乏嚴吾之譽簿書  
期會庶勉追裴馬之名

謝除叅知政事表

樓大防



文貳樞庭方慚玩愒晉陪宰路遽被推遷倍深臨谷之危  
莫遂循墻之請中謝竊以朝廷建輔號天子之四隣政事  
叅聞下丞相之一等定名稱於乾德復官制於建炎必求  
異能乃副隆委伏念臣頽齡景迫壯志日凋再掌更銓但  
守停年之格濫居宥府未寬思職之憂雖粗竭於謏材終  
莫裨於末議負二宜去有七弗堪宿恙漸侵將籲天而致  
禱誤恩狎至真踏地以靡遑况秉鈞當軸之虛負而知印  
狎班之分日兼與漢章之約仍從商皓之遊命服匪班復  
賜天閑之駿爰田增衍更開公社之封昔在本兵尚爲僥  
冒茲叨助理尤懼曠厥茲蓋伏遇 皇帝陛下盛德又新  
至誠樂與折衝禦侮坐於外寧聚精會神力先於內治

東求俊又寘在弼諧肆令衰退之蹤亦忝延登之數臣敢  
不益殫愚慮仰贊宏規曰都曰喻願竊慕賡歌之善知足  
知止庶幾從告老之私

謝簽書樞密院事表

樓大防

銓部爲真猶未經於滿歲機廷遙貳乃遽辱於頒恩遜避  
靡遑周章增惕中謝竊以官莫崇於執政職無重於本兵  
必求文武之全才以任國家之重事邊隅甫定尚勤宵旰  
之憂邦域以寧允藉弼諧之助豈應疲瘁可與幾微如臣  
者資實腐儒仕叨法從由父同於封駁故多積於怨仇十  
載歸閑仰戴乾坤之施一朝收召復觀日月之明不堪聽履  
之華復上垂車之請敢期誤渥俎贊洪樞血氣既衰止合

奉身而去軍旅未學孰知師命之嚴玷書殿之清班豈儲  
扃之下容被繡鞵於上駟束繆帶以襲衣采食有加寵榮  
已甚茲蓋伏遇 陛下人惟求舊政務圖新謂代言於受  
禪之初未忘孤迹迨趣還於更化之始深憫周年豈云術  
業之可稱蓋自春私之過厚遂容僥倖倍切凌兢臣敢不  
深感隆恩愈堅晚節老當益壯固欲殫報主之忠耄矣無  
能終恐負知人之鑒

天申節賀表

陸務觀

化國之日舒以長運啓千齡之盛天子有父尊之至心均  
萬寓之驩敢卽昌期虔申壽祝中賀恭惟 太上皇帝陛  
下宅心清靜受命溥將協氣熏為太平華夷街莫報之德  
于上帝臣方馳使傳阻綴朝班望睟表於雲霄敢恨微蹤  
之遠被頌殷於金石尚希薄技之陳

光宗冊寶賀表

陸務觀

龜食慈從考廟方嚴於典冊伏全樂備都人咸覲於禮容  
聖教茂昭驩聲旁達中賀恭惟 皇帝陛下道參穹壤德  
肖祖宗稽周王小忠之求躬虞帝終身之慕父傳歸子有  
光盛舉於兩朝天定勝人果見太平於今日乃咨元老大  
臣之參訂兼采議郎博士之討論勒崇垂鴻極高蟠厚臣  
在列觀龍飛之旦紬書奏麟趾之篇際遇特殊等夷罕及  
既莫預曲臺之議又阻從屬車之塵徒有悃誠形於夢想

賀明堂表

陸務觀

農扈屢豐協氣方流於絲宇合宮大享曠儀遂舉於中天  
驛置星馳高呼雷動伏以聖神在御析報聞行肆嚴長至  
之祠一舉上辛之典惟茲宗祀實在季秋既得萬國之驩  
心宜罄一精之嘉薦中賀恭惟 皇帝陛下範圍元化斧  
藻太平采皇祐之舊章茂建中和之極稽紹興之新制用  
適古今之宜上帝顧歆殊休叢委臣官縻遐徼心繫明廷  
考漢家汶上之圖嘆莫陪於潤色繼周頌我將之作尚自  
力於形容

江西到任謝表

陸務觀

疏恩趣召靡待一人之言改命遣行猶備四方之使丹衷

欲叙雪涕先傾中謝伏念臣稟資迂愚立身羈縻偶竊犁  
鉏之餘暇妄窺述作之淵源纍然自力於簡編老之心  
過矣見稱於流輩轉而上聞頃入對於燕朝實親承於睿  
獎然而異恩賜第弗由場屋之選掄特旨造廷非出公卿  
之論薦已分亟投於閑散豈期重累於生成此蓋伏遇  
皇帝陛下立賢無方用人唯已一洗拘攣之積弊廣收魁  
傑之遺才施及妄庸亦蒙省錄甫停追詔還畀使擅凡曰  
自結於上知皆俾無蹈於後宮海嶽之內纖塵墜露何所  
用之父母之愛幼子童孫茂以加此驅馳入境感懼填膺  
重念臣樸學守株孤身吊影素乏蚍蜉蝻子之助孰為輪  
困蟠木之容愴餘日之安歸抱微誠而永嘆方天子建中

和之極用告成功雖史近卜祝之間亦思自效尚憑長育  
不遂棄捐所願預草漢家檢玉之文未敢遽同堯民擊壤  
之作剝肝自訴伏鑽何辭疾痛飢寒仰而呼天誓靡求於  
世俗齋戒沐浴可以事帝冀終望於清光

嚴州到任謝表

陸務觀

穿延和之細仗面咫尺天佩新定之左符秩二千石叨塵  
過分感懼交懷中謝臣聞明主恩深書生命薄唐帝之知  
李白一官不及於生前漢皇之念相如遺稟徒求於身後  
況如臣輩莫望昔人猥緣一技之卑嘗綴百僚之末雖簪  
笏久違於昕謁乃姓名猶在於淵衷乘傳來歸兩奉召還  
之旨懷章欲上亟蒙趣對之榮親降玉音俯憐雪鬢勞其

久別蓋寵嘉近侍之所宜勉以屬文實臨遣守臣之未有  
茲蓋伏遇 皇帝陛下睿謨冠古英斷如神肆筆成書千  
載獨高於聖學刺經作制諸儒絕企於清光以臣夙被化  
於明時憐臣未廢書於晚歲將激昂其素志故闕略於往  
愆臣敢不戴使愚使過之恩念有社有民之寄懇棠陰而  
聽訟期無墜於家殼及瓜戍而代歸尚少酬於君賜

除寶謨閣待制謝表

陸務觀

陪衆雋以登瀛已慙薄陋扈六飛而上雍遽踐高華恩重  
命輕感深涕霽中謝伏念臣才非異稟家本至寒蒼稚遺  
書守先臣之孤學莊騷竒作誦諸老之舊聞竊慕隱居求  
志之心尤耻譁世取名之事年運而往道阻且長仕止爲

貧適遇四朝之盛際老猶不死遂爲六聖之遺民豈期垂  
盡之時更被非常之遇置之儒館命以信書特寬尸素之  
重誅不待汗青而加賞茲蓋伏遇 皇帝陛下道兼倫制  
學備誠明體穹穹厚厚之仁躋蕩蕩巍巍之治風行雷動  
號令靡隔於幽遐魚躍鳶飛人材不遺於疏賤雖耄期之  
已迫尚覆育之愈深臣敢不口誦訓辭心銘德澤入預甘  
泉之筆橐儻效微勞歸尋杜曲之桑麻終期洪造

謝致仕表

陸務觀

持橐甘泉已竊逢辰之幸掛冠神武又叨歸老之榮加恩  
俯念於耄年延賞特頒於申命伏讀絲綸之語曷勝犬馬  
之情中謝伏念臣家本窮閭世承孤學雖遇年齡之盛際

初無一日之微勞白首光陰已躡冠登瀛之選青雲步武亟  
陪上雍之班屬預奏於信書遂祈歸於故里奉祠雖佚竊  
食靡安茲存貢於忱辭始非承於俞旨至於特捐異數增  
賁襄門顧令么微獲被榮唯茲蓋伏遇 皇帝陛下仁參  
化育道極範圍繼粟繼肉以養賢才祝鯁祝噎以禮耄耄  
思正元之朝士寤寐不忘念山陰之老人生存無幾越拘  
孱於令甲聳觀聽於薦紳間編有光世類知勸而臣抱疴  
牀第絕望闕廷賤息何能亦忝及親之祿素風未墜豈無  
報國之期

逆曦授首稱賀表

陸務觀

天無私覆實均父母之仁邦有大刑爰下風雷之令英斷

若神明之速成功無畧刻之淹氛稜澄清頌敷洋溢中賀  
臣伏以高皇有作王室中興方犬戎窺蜀以憑陵賴驍將  
奮身而守衛念功無已分閫相承仰累朝寵數之非常雖  
舉族糜捐而曷報豈圖小醜自取參夷僭服自如攻元無  
憚受封割地已北通獯鬻之庭置戍奪符欲東扼瞿唐之  
險罪不勝於擢髮誅寧貸於闔門肆推曠蕩之恩實自聖  
神之造恭惟 皇帝陛下德配天地功光祖宗覽圖籍而  
動容每念兩京之未復奉廟祀而霄涕不忘九世之深讎  
蠢茲雛卵之微自投鼎鑊之地人情共憤天討遂加茹醢  
以賜諸侯雖特寬於漢法頭顱之行萬里已大震於戎心  
遙知群醜宵遁之餘無復並塞秋防之警臣身雖南陌名

寓西清馳驛四傳徒快鯨鯢之戮造朝旅賀莫趨鷓鷯之  
班臣無任

丞相率文武百寮請建重明節表

陸務觀

飛龍在天方仰君臨之德流虹繞渚實開聖作之祥宜紀  
昌辰用彰盛際恭惟 皇帝陛下承謨丕顯受命溥將致

養三宮備本朝之家法參決萬務得率土之民心正守初

臨積陰頓解於赫明離之象益昭出雲之符臣等不勝大

願請以九月四日爲重明節伏望 皇帝陛下俯察群情

亟頒俞旨施尊名建顯號侈宮昊發祥之期披皇圖稽帝

文伸臣民歸美之報著之令甲副在有司邦家增光天下

幸甚

丞相率文武百寮上皇帝賀三殿受冊表陸務觀

重慶有光仰東朝之慈愛雙親並奉極北內之尊榮正歲肇新彌文告備邦家之喜夷夏所同中賀伏以堯舜禹之相承蓋非一姓姜任姒之善繼又不同時參稽前聞孰擬昭代恭惟 皇帝陛下奄有萬寓統和三靈由至公大義膺寶運之傳講禮威盛容伸天下之養太史灼龜而獻北曲臺絲篔而具儀黃麾之仗夙陳簪紳在列白玉之冊特舉金石充庭既以隆孝道而通神明固將禮高年而厚風俗新又新而進德老吾老以及人臣等誤被選掄獲塵班著雖潤色討論於大典每慚稽古之踈然登降跪拜於路朝實竊逢辰之幸

瑞慶節賀表

趙汝談

社鼓斗樞赫聖朝之誕節川嶽貢奏良月以垂來惟在萬邦受天有祿中賀恭惟 陛下凝旒思道畢服勤於大德以保民而遠人爭致順附單小心於事帝而否數為嘉祥率土謳歌望雲祈懇願躡九皇之軌歲稱萬壽觴臣屬尼外同阻班庭賀獻書金鏡老非翰墨之才通表銀臺遠有韶鈞之慶

皇太后受冊寶賀皇帝表

趙汝談

宸闈展敬立政之大端寶冊揚鴻奉親之令典一人有慶百志惟熙中賀昔者周歌思齊基命子文王之母漢頌文樂傳序在高皇之孫微坤不成非日不耀共惟 陛下新

陟元后奄旬庶邦俛仰孳孳寤寐翼翼謂嘉珎御太宰享  
未足盡於孝心惟顯號建尊名施迺克符於公議詎龜協  
吉鏤玉推崇揭丕式以範民疾順風之偃草臣承之節傳  
弗遑觀國之光訂美詩書弟劇贊皇之德

皇后冊立賀皇帝表

熊子復

儀虛中壺執參協帝之圖祥降上穹受錫倪天之配光華  
振古鼓舞合生中賀臣聞看類盧殯亶于媯汭文纘莘女  
寔在合湯用能致孝而襲帝堯之行無憂而紹王季之作  
何幸三五之懿則乃當十一之以行公平昌期恭惟皇  
帝陛下獨運聖謨同符祖烈復古而內脩政既操天德之  
剛治國而先齊家亦資陰教之順遵燕謀於太上正鴻號

於長秋以安泰天之祝具神衆習聞乃妾至氣營生九廟  
之靈以定六宮之度臣欣逢盛事則造以來必然皆中  
兩庭詩播思齊願繼百男之詠儀陳長樂莫伸萬壽之呼  
臣無任





